

Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja

fax: + 387 33 552 810

selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja

fax: + 387 33 552 810

dzenita@sogfbih.ba

Sadržaj biltena:

Održana Javna rasprava o radnoj verziji Zakona o zaštiti i spašavanju	1
Održan prvi sastanak Radne grupe zadužene za izradu radnog materijala Zakona o lokalnoj samoupravi KS	2
Radna posjeta R.Hrvatskoj saveza opština i gradova BiH	2
INTERVJU: Ilija Nikić, načelnik Općine Usora	3
Savez potpisao Sporazum sa Misijom OSCE-a	4
O rješavanju problema pasa lutalica kroz sigurnost građana u lokalnoj zajednici	4
Široki Brijeg dobio Centar za informiranje, savjetovanje i obuku	5
Općina Centar Sarajevo organizirala promociju izdavanja izvoda iz matičnih knjiga	5
Svečano otvorena najljepša šetnica u Mostaru	6
Pokrenute aktivnosti na izgradnji luke u Orašju	6
Sanskom Mostu uručen certifikat o povoljnom poslovnom okruženju	7
INTERVJU: Mustafa Avdagić, načelnik Općine Sanski Most	8
U Vladi FBiH održan sastanak povodom inicijative za donošenje Zakona o gradovima FBiH	13

Bilten Saveza općina i gradova Federacije Bosne i Hercegovine

ODRŽANA JAVNA RASPRAVA O RADNOJ VERZIJI ZAKONA O ZAŠTITI I SPAŠAVANJU



Sa Javne rasprave - ČITLUK, 19.06.2013.

ČITLUK, 19. juni/lipanj – U sklopu komponente "Načelnici za razvoj lokalne samouprave" projekta „Doprinos ustavnoj reformi u BiH“, danas je u Čitluku, u organizaciji Saveza općina i gradova Federacije Bosne i Hercegovine, održana Javna rasprava o radnoj verziji Zakona o zaštiti i spašavanju u FBiH.

Projekt je pokrenut od strane Saveza općina i gradova FBiH i Savez opština i gradova Republike Srpske uz potporu Švicarske agencije za razvoj i suradnju i Švicarske ambasade u BiH.

Na početku današnje Javne rasprave, koja se održala u Hotelu Brotnjo, okupljene je pozdravio domaćin Ivo Jerkić. Načelnik Općine

Čitluk ovom je prilikom nešto više kazao o samom projektu i ulozi načelnika u realizaciji projekta, ali i o samoj radnoj verziji Zakona o zaštiti i spašavanju u FBiH.

Javna rasprava o radnoj verziji Zakona o zaštiti i spašavanju u FBiH već je održana u Novom Sarajevu, a uz današnju javnu raspravu u Čitluku planirano je održavanje javne rasprave i u Bosanskoj Krupi. Prema riječima Amira Kupusije, predstavnika Saveza općina i gradova FBiH, na spomenute rasprave su pozvani svi relevantni predstavnici koji mogu aktivno sudjelovati i komentirati radni materijal Zakona i na taj način pomoći u njegovom kreiranju. Uz informacije o Javnim raspravama o radnoj verziji Zakona o zaštiti i spašavanju u FBiH Kupusija je okupljene upoznao i sa cijelim projektom koji uključuje pet zakona.

Moderatorica današnje rasprave bila je Vildana Smajović koja je istakla kako je dosadašnji Zakon imao dvije dogradnje, ali da potreba za daljnjim dogradnjama i dalje postoji.

Član ekspertnog tima, Predrag Šupljeglav, detaljnije je govorio o problematici zaštite i spašavanja, te kazao kako je „novina u zakonu to što se sistem zaštite i spašavanja postavlja u aktivan odnos, znači više se radi na prevenciji jer sadašnji zakonodavni okvir u suštini postavlja sistem zaštite i spašavanja u jedan poluaktivan odnos, sistem koji čeka da se dogodi nesreća pa onda reagira. Mi radimo koncept sistema koji će biti stalno aktivan, koncept sistema u kojemu će se više pažnje posvećivati prevenciji nesreće“, i dodao kako nije dobro da stožer civilne zaštite u trenucima prirodnih i drugih nepogoda preuzima ingerencije organa uprave, te da su aktivnosti organa uprave izraženije do trenutka proglašenja nepogode i da tek nakon proglašenja nepogode stožeri preuzimaju ulogu rukovođenja i rade ono za što su zakonom određeni.

U svom izlaganju načelnik Općine Novo Sarajevo Nedžad Koldžo kazao je kako postojeći Zakon ima čitav niz dobrih rješenja, no i istaknuo kako se u oblasti zaštite i spašavanja moraju napraviti korjenite promjene i reforme jer se Zakon o zaštiti i spašavanju pokazao neučinkovitim. Na kraju svog izlaganja Koldžo je zaključio kako zakon mora biti primjenjiv u praksi i temeljen na europskim standardima, navodeći primjer nesreće krizera Costa Concordie nakon čijega je nasukavanja na obali otoka Giglio 38 različitih službi sigurnosti zaštite i spašavanja u roku od dva sata bilo na mjestu događaja.

Nakon uvodnih izlaganja u raspravi su sudjelovali Emir Bubalo, načelnik općine Konjic, predstavnica Federalnog ministarstva raseljenih osoba i izbjeglica, predstavnici općina Čitluk, Čapljina i Novo Sarajevo kao i drugi sudionici Javne rasprave.

Sljedeća Javna rasprava o ovom zakonu će biti održana 2. jula/srpnja u Općini Bosanska Krupa.



Sa Javne rasprave - NOVO SARAJEVO 12.06.2013.

Održan sastanak u vezi osnivanja Kluba povelje gradonačelnika u BiH	13
Predstavnici 13 općina TK potpisali energetsku povelju	13
Promovirani projekti koji će biti finansirani iz sredstava IPA BiH-Crna Gora	14
Regionalna konferencija o općinskim finansijama, prostornom planiranju i raspolaganju zemljištem	14
Javni poziv za finansiranje projekata lokalnog ekonomskog razvoja	15
Najava održavanja proširene sjednice Predstavničkog doma Parlamenta FBiH	15
Najava održavanja dana općina za mjesec juli/srpanj	16

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmed.eu
www.tacso.org
www.euroinfocenter.ba
www.balkanfund.org
www.eurlesmed.com
www.eacea.ec.europa.eu

ODRŽAN PRVI SASTANAK RADNE GRUPE ZADUŽENE ZA IZRADU RADNOG MATERIJALA ZAKONA O LOKALNOJ SAMOUPRAVI KS



Savez općina i gradova Federacije Bosne i Hercegovine organizirao je dana 18. juna/lipnja u prostorijama Općine Stari Grad Sarajevo prvi sastanak Radne grupe koja ima zadatak da pripremi radni materijal prijedloga Zakona o lokalnoj samoupravi Kantona Sarajevo.

Naime, na sastanku održanom dana 13.05.2013. godine u prostorijama Kantona Sarajevo u vezi sa izradom Prijedloga zakona o lokalnoj samoupravi, Ministarstvo pravde i uprave Kantona Sarajevo

usvojilo je zaključak da se u sklopu Saveza općina i gradova FBiH formira radna grupa od predstavnika Grada i općina, koja će pripremiti radni materijal Prijedloga zakona o lokalnoj samoupravi. Slijedom navedenog zaključka, do sada je devet jedinica lokalne samouprave sa područja Kantona Sarajevo imenovalo svoje predstavnike u Radnu grupu.

Na prvom sastanku kojem su prisustvovali predstavnici općina Stari Grad Sarajevo, Centar Sarajevo, Novi Grad Sarajevo, Trnovo, Ilidža, Grada Sarajevo i Saveza općina i gradova Federacije BiH, članovi Radne grupe su za predsjednika imenovali g-dina Šukriju Bakšića, profesora ustavnog prava i predsjednika Komisije za statut i propise Općine Stari Grad Sarajevo. Dogovoreno je da se slijedeći sastanak Radne grupe održi 28. juna/lipnja u Općini Stari Grad Sarajevo na koji će članovi Radne grupe doći sa definisanim stavovima vezanim za prijedlog Zakona o lokalnoj samoupravi, a posebno u pogledu čl. 8., 9. i 10. kojima se reguliše pitanje nadležnosti općina i Grada Sarajeva.



RADNA POSJETA REPUBLICI HRVATSKOJ SAVEZA OPŠTINA I GRADOVA BOSNE I HERCEGOVINE

U sklopu projekta „Jačanje kapaciteta Saveza opština i gradova u BiH - CDMA“, kojeg implementira VNG International uz podršku Švedske agencije za razvoj (SIDA), upriličena je, za oba saveza iz BiH, posjeta značajnim institucijama za razvoj i unapređenje rada lokalne samouprave u Republici Hrvatskoj. Cilj posjete je bio da savezi opština i gradova iz BiH, čuju iskustva i prakse Saveza lokalnih samouprava iz Hrvatske, kao i drugih relevantnih institucija, o njihovoj ulozi i radu u procesu pristupanja Evropskoj Uniji.

Savezi lokalnih samouprava BiH (Savez općina i gradova Federacije Bosne i Hercegovine - SOGFBiH i Savez opština i gradova Republike Srpske - SOGRS) imali su priliku sresti se sa: Udrugom gradova Republike Hrvatske, Udrugom općina Republike Hrvatske, Ministarstvom Uprave, Službom za Evropske Integracije i EU fondove grada Zagreba, Evropskim pokretom Republike Hrvatske i Ministarstvom za regionalni razvoj i fondove EU. Tokom trodnevne posjete predstavnici saveza iz BiH su imali priliku da čuju iskustva svojih kolega iz regije o njihovim dobrim praksama kao i poteškoćama u procesu pridruživanja EU, te koji su to koraci koji predstoje za saveze BiH u ovom procesu. Obzirom da Republika Hrvatska od 01.07.2013. godine postaje članica Evropske Unije, to će u mnogome mijenjati položaj BiH ka Hrvatskoj, posebno u pogledu statusa jedinica lokalnih samouprava te su predstavnici oba saveza iz BiH ocijenili ovu posjetu kao vrlo korisnu i bitnu u definisanju njihovih budućih koraka.

Oba saveza iz BiH su, unutar svojih struktura formirali Jedinicu za Evropske integracije, te se ovom posjetom nastojao steći uvid u rad sličnih organizacija na polju zadataka u EU - integracijama, a između ostalog, i promovirati njen rad na međunarodnom planu.

Posjeta je organizovana u periodu od 10. – 14.06.2013.godine.



Savez / Zajedno za uređenu i razvijenu lokalnu samoupravu

INTERVJU: ILIJA NIKIĆ, NAČELNIK OPĆINE USORA

Razgovarala: Sanela KARAICA

SARAJEVO, 9. juni/lipanj (ONASA) - Načelnik Općine Usora Ilija Nikić u intervjuu za Agenciju ONASA govori o raspodjeli javnih prihoda u FBiH, saradnji sa susjednim općinama, ekonomskoj situaciji, zaposlenosti, budućim aktivnostima i očekivanjima.

ONASA: Mnogi smatraju nepravednim postojeći princip raspodjele javnih prihoda u Federaciji BiH. Šta Vi mislite o tome i da li ste zadovoljni iznosom koji dobije Općina Usora?

NIKIĆ: Ovdje nije samo pitanje kako se dijeli, već i šta se dijeli. S obzirom na značajno smanjenje sredstava koja dolaze od raspodjele PDV-a, imam osjećaj da i ono što trebamo dijeliti trpi znatnija umanjena prije nego raspodjela krene. Ovakvim principom da se siromašnima najmanje daje dolazimo do sve većih razlika u razvoju pojedinih dijelova Federacije BiH. Ako na ovakav način otežavamo razvoj pojedinih sredina, one će sve više ovisiti o pomoći onih koji su razvijeni, a to nije dobro ni za jedne ni za druge. Ove godine u naš proračun dolazi oko 30 posto manje sredstava u odnosu na 2012., a čak za 45-50 posto manje u odnosu na 2011. godinu. Sa ovim sredstvima nema razvoja i tu nema mjesta zadovoljstvu.

ONASA: Općina Usora je jedna od novoformiranih općina na teritoriji Zeničko-dobojskog kantona (ZDK). Koliko ste upućeni na susjedne općine Doboj, Doboj Jug i Tešanj i kakva je saradnja s njima?

NIKIĆ: Uobičajeno je da se sa susjedima održavaju dobri odnosi. Postoji puno razloga za to, a naročito treba naglasiti neke zajedničke projekte poput projekta toplifikacije, povezivanjem na Dobojsku toplanu općine Doboj - Jug, te dijelova općina Tešanj i Usore. U zadnje vrijeme dosta aktivnosti se vodi na izgradnji kanalizacije i odvodnje za općine Tešanj, Usoru i Doboj - Jug. Gotovo svakodnevno se razmjenjuju informacije ili traže određeni podaci. Povremeno se održavaju i susreti načelnika navedenih općina i razgovara o zajedničkim interesima, mogućim zajedničkim infrastrukturnim i gospodarskim projektima, projektima povratka prognanih i svim drugim aktuelnim pitanjima. Općina Usora će nastojati da se suradnja i dalje nastavi a posebno je to potrebno u oblasti povratka, jer želimo pomoći svim prognanim da se vrate na svoja ognjišta.

ONASA: Koji su najčešći problemi sa kojima se suočava općina Usora i kako biste ocijenili trenutnu ekonomsku situaciju?

NIKIĆ: Općina Usora je mala i nerazvijena općina. Nakon njenog utemeljenja sve je trebalo graditi: puteve, škole, dom zdravlja, zgradu Općine i sve ostalo. Gospodarstvo se razvijalo, ali ne u dovoljnoj mjeri, zbog čega je iz Usore u poslijeratnom periodu oselio veći broj obitelji. Izgradnja gospodarskih zona, izrada prostornog plana i strategije razvoja općine, daje nam nadu za stvaranje novih radnih mjesta i lagan oporavak gospodarstva.

ONASA: Jeste li zadovoljni stepenom zaposlenosti i u kojim oblastima ima najviše zaposlenih?

NIKIĆ: Na evidenciji biroa za zapošljavanje trenutno je nešto malo iznad 1.000 osoba, a uposlenih je oko 850 stanovnika općine Usora. Ovakav odnos je apsolutno nepovoljan i stanje nije dobro. Najviše uposlenih je u oblastima uslužnih djelatnosti.

ONASA: Općina Usora se nalazi na relativno prometnoj komunikaciji, a crkve sv. Ante Padovanskog i sv. Ane predstavljaju bitna mjesta na kojima se okupljaju hodočasnici. Kako to utiče na razvoj općine?

NIKIĆ: Dolazak hodočasnika je povremeni i nema značajnijeg uticaja na razvoj gospodarstva. Međutim, prometnost komunikacije na kojoj se nalazi općina Usora je vrlo značajna i u narednom periodu to moramo mnogo bolje iskoristiti u stvaranju poslovnog ambijenta.

ONASA: Na čemu će biti akcenat rada Općine u narednom periodu, odnosno čemu ćete posebno posvetiti pažnju?

NIKIĆ: Naš razvoj kasni u odnosu na naše okruženje. Moramo raditi paralelno na nekoliko značajnih projekata, a posebno se to odnosi na: poboljšanje vodosnabdijevanja; izradu prostorno-planske dokumentacije i strategije razvoja; proširenje postojeće gospodarske zone za novih deset hektara; izgradnju mosta na rijeci Usori uz magistralni put Doboj - Teslić; izgradnju kanalizacione mreže; deminiranje površina pod minama; obnovu oštećenih i porušenih objekata te stvaranje uvjeta za razvoj poljoprivredne proizvodnje.



Ilija Nikić, načelnik Općine Usora



Grb Općine Usora

“Ove godine u naš proračun dolazi oko 30 posto manje sredstava u odnosu na 2012., a čak za 45-50 posto manje u odnosu na 2011. godinu. Sa ovim sredstvima nema razvoja i tu nema mjesta zadovoljstvu.”



Usora

Posebnu pažnju ćemo posvetiti razvoju gospodarstva i na taj način pokušati zaustaviti proces iseljavanja stanovnika općine Usora. Već su pokrenute određene aktivnosti oko predstavljanja naših mogućnosti i raspoloživih potencijala prema potencijalnim ulagačima iz Hrvatske, ali i šire. Povoljna ponuda uređenog građevinskog zemljišta, brzo i jednostavno dobivanje dozvole za gradnju, raspoloživa radna snaga, povezanost sa značajnijim prometnicama i buduća autocesta Koridora 5c neke su od naših prednosti. Svakako, treba napomenuti i veliki broj naših sugrađana koji rade u Hrvatskoj i nekoliko najrazvijenijih zemalja Europe i čije lobiranje za Usoru može dovesti strane ulagače.

Naša razvojna agencija vodi aktivnosti oko educiranja mladih kadrova uz pomoć razvojnih agencija Osijeka i Varaždina. Vjerujem u mlade obrazovane ljude. Oni će dobiti priliku da svojim radom i sposobnošću naprave one najznačajnije promjene koje Usori trebaju.

SAVEZ OPĆINA I GRADOVA FBiH POTPISAO SPORAZUM SA MISIJOM OSCE-A U BiH



SARAJEVO, 19. juni/lipanj – Savez općina i gradova Federacije Bosne i Hercegovine potpisao je danas sa Misijom OSCE-a u BiH Sporazum o partnerstvu koji će ojačati saradnju Saveza sa općinskim vijećima i intenzivirati međupopćinsku i međuinstitucionalnu saradnju u BiH.

Savez općina i gradova, kao tijelo koje predstavlja platformu za razmjenu znanja i najboljih primjera iz prakse između jedinica lokalne samouprave i koje lobira za ostvarenje interesa svojih članica kod viših nivoa vlasti, prepoznat je od strane OSCE-a kao

relevantan partner za jačanje međupopćinske saradnje.

Naime, Misija OSCE-a ima dugogodišnju saradnju sa Savezom, te u skladu sa ključnim strateškim prioritetima, da predstavlja i zastupa interese jedinica lokalne samouprave, Misija OSCE-a proširuje tu saradnju kroz pružanje podrške i usluga predstavničkim organima na lokalnom nivou. Oblasti saradnje koje su naznačene u Sporazumu o partnerstvu su utvrđene zajedno sa Savezom i drugim institucijama u BiH.

O RJEŠAVANJU PROBLEMA PASA LUTALICA KROZ SIGURNOST GRAĐANA U ZAJEDNICI

JAJCE, 14. juni/lipanj – Načelnici općina Jajce, Gradačac i Lopara sastali su se u četvrtak, 13. juna u Sarajevu sa predstavnicima Razvojnog programa Ujedinjenih nacija BiH kako bi razgovarali o predstojećim aktivnostima procjene stanja i potreba u vezi sa populacijom pasa lutilica, te o time uzrokovanim problemima u lokalnim zajednicama, navodi se na web stranici Općine Jajce.

Na osnovu sačinjene procjene i spremnosti lokalnih zajednica da se počnu baviti ovim problemom, Međunarodni fond za dobrobit životinja (IFAW) će u saradnji sa UNDP-om podržati razvijanje operativnih planova kojim bi se radilo na rješavanju ovog problema. Osnovni cilj ovih aktivnosti jeste podrška procesu stvaranja dugoročnih i održivih planova upravljanja populacijom pasa.

Forumi za sigurnost građana, čije je osnivanje podržano projektima UNDP-a, identificirali su problem pasa lutilica kao problem sigurnosti građana. Iz tog razloga, UNDP je sklopio Sporazum o saradnji sa IFAW-om, sa namjerom da se lokalnim zajednicama osigura adekvatna podrška, koja će voditi onim rješenjima koja će biti odraz specifičnih okolnosti i potreba lokalne zajednice, a koja će istovremeno biti u skladu sa važećim domaćim propisima i međunarodnim standardima. IFAW je u svijetu poznata organizacija sa dokazanim iskustvom i ekspertizom upravo u radu sa lokalnim zajednicama, pomažući im pri tome da sami kreiraju planove upravljanja populacijom pasa.

IFAW pristup ovom problemu zasniva se na uvažavanju specifičnosti lokalnih zajednica, ali i njihovoj opredjeljenosti da uz pomoć IFAW-a sami osmisle planove upravljanja ovom populacijom koji će odgovarati potrebama zajednice ali i uvažavati principe dobrobiti životinja.

Prisutni predstavnici općina Jajce, Gradačac, Sanski Most i Lopare, iskazali su spremnost da podrže ovu inicijativu i obećali predani angažman predstavnika njihovih općina u zajedničkom radu na iznalaženju najprimjerenijeg rješenja koje će voditi kako sigurnijem okruženju građana tako i boljem sistemu brige o psima lutilicama.

KORISNI LINKOVI ZA PREDPRISTUPNE FONDVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.chib-eu.org
www.cbc.bih-mne.org
www.srb-bih.org
www.cbc-cro-bih.net
www.programmamed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu



IFAW
International Fund
for Animal Welfare


Savez / Zajedno za uređenu i razvijenu lokalnu samoupravu

ŠIROKI BRIJEG DOBIO CENTAR ZA INFORMIRANJE, SAVJETOVANJE I OBUKU

Veleposlanica Kraljevine Španjolske u Bosni i Hercegovini Maria Aurora Mejia Eraskin, predsjednik Vlade Županije Zapadnohercegovačke Zdenko Čosić i načelnik Općine Široki Brijeg Miro Kraljević otvorili su 12. juna/lipnja Centar za informiranje, savjetovanje i obuku (CISO), navodi se na Općinskoj web stranici.

Otvaranje Centra dio je Programa zapošljavanja i zadržavanja mladih (YERP) koji zajednički provode agencije Ujedinjenih naroda (UNDP, UNICEF, UNFPA, IOM i UNV), a u suradnji s domaćim nadležnim institucijama među kojima su i službe za zapošljavanje. Program podržava Vlada Kraljevine Španjolske kroz Fond za dostizanje milenijumskih razvojnih ciljeva (MDG-F).

CISO je, inače, namijenjen nezaposlenim osobama do 30 godina starosti, kojima će biti pružene informacije, savjeti i usluge radi svladavanja novih vještina i bržeg pronalaženja zaposlenja. Nalazi se u zgradi Službe za zapošljavanje podružnice Široki Brijeg u ulici kralja Tomislava 1.



OPĆINA CENTAR SARAJEVO ORGANIZIRALA PROMOCIJU IZDAVANJA IZVODA IZ MATIČNIH KNJIGA SA NEOGRANIČENIM ROKOM VAŽENJA



Sa promocije izdavanja izvoda iz matičnih knjiga

U velikoj sali Općine Centar Sarajevo održana je 17. juna/lipnja promocija novih matičnih knjiga i izvoda iz matičnih knjiga rođenih i uvjerenja o državljanstvu sa neograničenim rokom važenja, koji se od 17. juna/lipnja izdaju u Federaciji BiH.

Domaćini ovog skupa su bili načelnik Općine Centar Dževad Bećirević i ministar unutrašnjih poslova Federacije Bosne i Hercegovine Predrag Kurteš, a prisustvovala su brojne zvanice, među kojima i dr. Zlatko Lagumdžija, zamjenik predsjedavajućeg Vijeća ministara i ministar vanjskih poslova BiH i drugi predstavnici svih nivoa domaće vlasti, kao i predstavnici međunarodne

zajednice - dr. Renzo Daviddi, zamjenik šefa Delegacije Evropske unije u BiH i Dietrun Gunther, pravna savjetnica u Odjelu UNHCR u BiH za međunarodnu zaštitu.

Predrag Kurteš je u svom obraćanju izjavio da je 11 mjeseci prije roka za implementaciju Zakona o matičnim knjigama, počelo u 78 općina u Federaciji BiH i gradu Mostaru izdavanje izvoda iz matičnih knjiga i uvjerenja o državljanstvu bez roka važenja. „Krajem prošle godine okončana je procedura javne nabavke za ovu godinu 2.880 novih matičnih knjiga i 2.040.000 obrazaca izvoda iz matičnih knjiga i uvjerenja, koji zadovoljavaju najviše evropske standarde i višestruko su tehnički zaštićeni od mogućnosti falsifikovanja i drugih vrsta zloupotreba“, rekao je Kurteš i dodao da Federalno ministarstvo unutrašnjih poslova nastavlja aktivnosti na uspostavljanju matičnog registra, elektronske baze podataka iz svih matičnih knjiga koje se vode u Federaciji, čijim uspostavljanjem će se građanima Federacije BiH omogućiti da svoje izvode mogu podići u bilo kojem općinskom matičnom uredu, bez obzira na mjesto boravka te da uspostava matičnog registra treba biti završena do maja/svibnja 2014. godine.

Načelnik Dževad Bećirević je izrazio zadovoljstvo što je Općina Centar, kao jedna od najboljih općina u BiH i regionu i koja od 2004. godine radi po međunarodnom standardu kvaliteta ISO 9001, izabrana za domaćina promocije jer se tu izdaje daleko najveći broj izvoda iz matičnih knjiga u odnosu na sve druge općine u BiH. Bećirević je naglasio da je izdavanje novih izvoda iz matičnih knjiga sa neograničenim rokom važenja jedan od najznačajnijih poslova urađenih proteklih godina i da će to dovesti do poboljšanja usluga građanima, uštede vremena i novca i smanjenja administracije.

Predstavnici međunarodne zajednice dr. Renzo Daviddi i Dietrun Gunther su izrazili zadovoljstvo što prisustvuju promociji i naglasili da je uspostavljanjem novih matičnih knjiga i izvoda bez roka trajanja učinjen veoma važan korak u sigurnosti i zaštiti podataka i dokumenata neophodnih za liberalizaciju viznog režima.



Sa promocije izdavanja izvoda iz matičnih knjiga

11 mjeseci prije roka za implementaciju Zakona o matičnim knjigama, počelo u 78 općina u Federaciji BiH i gradu Mostaru izdavanje izvoda iz matičnih knjiga i uvjerenja o državljanstvu bez roka važenja.

Novootvorena šetnica u
MostaruKORISNI LINKOVI ZA PREDPRISTUPNE
FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

Projekt rekonstrukcije šetnice vrijedan je preko 1.120.000 KM, a financirali su ga Ministarstvo prometa i komunikacija Federacije BiH koji su za popločavanje izdvojili novac u vrijednosti oko 800.000 KM. UNDP je donirao oko 100.000 KM,



Sa sastanka u Orašju

SVEČANO OTVORENA NAJLJEPŠA ŠETNICA U MOSTARU

MOSTAR, 12. juni/lipanj – Sinoć je službeno otvorena Ulica Nikole Šubića Zrinskog, od Španjolskog trga do Trga hrvatskih velikana.

Ulicu odnosno šetnicu zajednički su svečano otvorili mostarski gradonačelnik Ljubo Bešlić, španjolska veleposlanica u BiH Aurora Meiya, predstavnik UNDP-a Jurij Afanasijev te federalni ministar prometa i komunikacija Enver Bijedić.

Po riječima federalnog ministra Bijedića, Mostar je dobio jednu od najljepših šetnica u BiH. Osvrnuo se na ratno vrijeme kada je Mostar pretrpio veliko razaranje naglasivši pri tom kako je Mostar zaslužio da zablista. "Završen je jako važan projekt i još jedno obećanje je ispunjeno", istaknuo je Bijedić.

I mostarski gradonačelnik istaknuo je kako je Mostar spomenutim projektom dobio najljepšu šetnicu u BiH.

"Šetnica i Španjolski trg će svakako trajno povezati građane Mostara s građanima Španjolske, ali i ostalih dijelova svijeta...", istaknuo je Bešlić.

U svečanom programu otvorenja sudjelovale su Mostarske mažoretkinje, Hrvatska glazba te klapa Hrvoje.

Projekt rekonstrukcije šetnice vrijedan je preko 1.120.000 KM, a financirali su ga Ministarstvo prometa i komunikacija Federacije BiH koji su za popločavanje izdvojili novac u vrijednosti oko 800.000 KM. UNDP je donirao oko 100.000 KM, za javnu rasvjetu i klupe.

Grad Mostar je za podzemne instalacije (odvodnja, kablovi javne rasvjete i el. instalacija), hidraulične zapreke, zelenilo, nadzor nad radovima izdvojio novac u vrijednosti oko 220.000 KM. Rekonstruirane su kompletne podzemne instalacije, položene električne instalacije i postavljeni ormari sa mogućnošću električnog priključka duž cijele ulice (za eventualne manifestacije, sajmove i sl.), postavljena najsuvremenija javna rasvjeta sa LED svjetiljkama, položene cijevi za navodnjavanje "zelenih otoka" uz platane, izgrađen je sustav odvodnje oborinskih voda, popločano oko 4.000 m² površine autohtonim kamenom (bijeli krečnjak) debljine 8 cm. Postavljene hidraulične zapreke u cilju sprečavanja neovlaštenog ulaska vozila, zasađene sadnice u "zeleni otok" uz platane.

Postavljeno je 25 klupa, uređeni platani i popločani nogostup od Španjolskog trga do Vijećnice. Ovim je zaokružena cjelina sa Španjolskim trgom, projektom vrijednim 960.000 KM, od čega je Grad Mostar osigurao 250.000, a ostatak španjolska Vlada.



POKRENUTE AKTIVNOSTI NA IZGRADNJI LUKE U ORAŠJU

U sjedištu Vlade Županije Posavske u Orašju, a na inicijativu predsjednika Vlade ŽP Marijana Oršolića, 18. juna/lipnja održan je sastanak predstavnika Agencije za vodno područje rijeke Save – Sarajevo, predstavnika općine Orašje, predsjednika Skupštine ŽP kao i ministara u Vladi ŽP na kojem je prezentiran Elaborat o utjecaju izgradnje luke u Orašju na zaštitne vodoprivredne objekte. Projekt je nazvan futurističkim za općinu Orašje, Županiju Posavsku, čak regionalnog značenja. Međunarodna komisija za sliv rijeke Save (Savsku komisija) bit će detaljno upoznata sa pokrenutim aktivnostima u Županiji Posavskoj.

Lokacija buduće luke je neposredna blizina središta

Orašja, gdje je već planirana gradnja parkinga, postoji pristupni put, a povezan je i sa širim projektom čišćenja korita rijeke Save kojeg je već odobrila Svjetska banka, što bi omogućilo turistički razvoj posavske općine. Elaborat nudi tri varijante izgradnje luke u Orašju, a vrijednost projekta, u ovisno od odabira varijante, kreće se oko 5 milijuna maraka.



Lokacija buduće sportske luke



"Radi se o jednom od najvećih infrastrukturnih projekata na općini Orašje koji bi mogao značajno oživjeti gospodarsku, ali i turističku sliku ovog posavskog područja. Njegovo vrijeme tek dolazi. Radi se o gradnji sportske luke i parkinga iza riječnog nasipa, čime bi riješili gorući problem općine Orašje. Naša je obveza bila uraditi projektnu dokumentaciju koju financira Agencija za vodno područje rijeke Save, kako bi bili spremni za apliciranje prema IPA fondovima i prema IPA 2, kao i prema grantovima na Federalnoj razini. Manji financijski udio imala bi Županija i Općina. Ovim se otvara i prostor za turistički razvoj. Općina Orašje je u svojem urbanističkom planu predvidjela projekt, tako da se on uklapa u veliku razvojnu priču ovoga područja. Sve se nadovezuje i na gradnju koridora Vc, značajnog za cijelu BiH, što otvara pokretanje još jednog projekta u općini Odžak oko izgradnje teretne luke u Odžaku", kazao je Marijana Oršolić predsjednik Vlade ŽP Oršolić.

"Zadatak zbog kojeg smo došli je prezentacija Elaborata izgradnje luke u Orašju i tri varijante njene gradnje. Ideja je potekla od premijera Vlade Županije Posavske kao i od načelnika općine. Projekt je predviđen urbanističkim planom općine prije svega zbog rijeke Save kao međunarodnog vodotoka 1. kategorije. Također, rijekom Savom treba da bude povećan promet, što otvara i veće mogućnosti razvoja ovoga područja. Sportska luka u Orašju bila bi namijenjena za određen broj plovila, a broj bi se kretao od 60 do 88 priveznih mjesta za mala plovila. Projekt predviđa i gradnju parkinga iza riječnog nasipa. Bitno je da ova Županija, Vlada, Agencija, ima projekt kojim može aplicirati za sredstva. Otvorili smo još neka aktualna pitanja vezana za projekte u Županiji Posavskoj", kazao je Sejad Delić, direktor Agencije za vodno područje rijeke Save Sarajevo.

"Radi se o jednom od najvećih infrastrukturnih projekata na općini Orašje koji bi mogao značajno oživjeti gospodarsku, ali i turističku sliku ovog posavskog područja.

Radi se o gradnji sportske luke i parkinga iza riječnog nasipa, čime bi riješili gorući problem općine Orašje.

SANSKOM MOSTU URUČEN CERTIFIKAT ZA POVOLJNO POSLOVNO OKRUŽENJE



SARAJEVO, 12. juni/lipanj – Sanski Most, Prijedor, Bjelovar, Ivanec, Piroć, Ruma, Strumica i Veles prve su lokalne samouprave u jugoistočnoj Evropi koje su provedenim reformama i unaprijeđenjima u radu administracije zaslužile regionalni certifikat koji potvrđuje da su to sada gradovi i općine s povoljnim poslovnim okruženjem, saopćio je Ured za odnose s javnošću Vlade Federacije BiH. Certifikati su čelnicima tih lokalnih samouprava svečano uručeni danas na II regionalnom kongresu o povoljnom poslovnom okruženju održanom u Zagrebu, na kojem je sudjelovao i

federalni ministar razvoja, poduzetništva i obrta Sanjin Halimović.

Na ovom kongresu su se okupili i politički i poslovni lideri iz Hrvatske, BiH, Makedonije i Srbije kako bi sagledali izazove i mogućnosti lokalnog ekonomskog razvoja i saradnje u okviru CEFTA i šire, imajući u vidu predstojeće pristupanje Hrvatske Evropskoj uniji.

Dodjelom certifikata završena je pilot faza projekta "Certifikacija općina s povoljnim poslovnim okruženjem u jugoistočnoj Evropi (BFC SEE)" koji su provele partnerske organizacije iz četiri zemlje - Nacionalna alijansa za lokalni ekonomski razvoj (Srbija), Ekonomski fakultet u Rijeci, Ministarstvo za ekonomske odnose i regionalnu saradnju Republike Srpske, Ministarstvo razvoja, poduzetništva i obrta Federacije BiH, Zajednica jedinica lokalnih samouprava - ZELS i Savez privrednih komora Makedonije.

Realizaciju projekta finansijski je podržala Vlada Republike Nemačke preko GIZ Otvorenog regionalnog fonda za modernizaciju općinskih usluga (GIZ ORF MMS).

Ministar Halimović svečano je uručio certifikat načelniku općine Sanski Most Mustafi Avdagiću koja je ispunila sve potrebne uslove za certifikaciju.

"Ovo je dokaz da Općina Sanski Most funkcioniše tako da postojećim privrednicima i potencijalnim investitorima može ponuditi povoljno poslovno okruženje za dobro poslovanje i privlačenje stranih investicija na dobrobit svih stanovnika općine", rekao je Halimović.

U proces certifikacije uključeno je još deset gradova i općina od kojih su iz BiH Banjaluka i Ljubuški, za koje se očekuje da do kraja godine, također, ispune zadane kriterije i steknu certifikat o povoljnom poslovnom okruženju.

Projekt je sa pilot fazom stekao regionalni karakter s ciljem da se uspostavi zajednički standard koji će kroz unaprijeđenje i harmonizaciju lokalnih uslova poslovanja omogućiti poređenje općina i njihovih performansi i doprinijeti da se zajedničkim nastupom kao regija lakše nametnu investitorima, jer s certifikatom stižu pečat kvaliteta usluga koje pružaju gospodarstvu i građanima, navodi se u saopćenju.



"Ovo je dokaz da Općina Sanski Most funkcioniše tako da postojećim privrednicima i potencijalnim investitorima može ponuditi povoljno poslovno okruženje za dobro poslovanje i privlačenje stranih investicija na dobrobit svih stanovnika općine", rekao je Halimović.



Načelnik Općine Sanski Most

INTERVJU: MUSTAFA AVDAGIĆ, NAČELNIK OPĆINE SANSKI MOST

Razgovarao: Adis BRDARIĆ

SARAJEVO, 18. juni/lipanj (ONASA) - Načelnik Općine Sanski Most Mustafa Avdagić u intervjuu za Agenciju ONASA govori, između ostalog o ekonomskoj situaciji na području općine, nosiocima privrednog razvoja, stepenu zaposlenosti, ekonomskim prilikama u općini, turističkim potencijalima te najčešćim problemima sa kojima se susreće u radu.

ONASA: Na čemu će biti akcenat rada lokalne vlasti u Općini Sanski Most u narednom periodu?

AVDAGIĆ: Općina Sanski Most je trenutno u fazi izrade nove Strategije lokalnog razvoja u saradnji s UNDP, a prema MIPRO metodologiji, gdje će osnovni strateški fokusi biti unapređenje sistema podrške lokalnoj privredi i povećanje obima domaćih i stranih investicija, zatim izrada resursnog partnerstva energetskog sektora, organske poljoprivrede i okoliša, čime ćemo stvoriti realnu osnovu i za razvoj turizma, te izgradnja kapaciteta javne uprave u cilju poboljšanja kvaliteta usluga, lokaliziranja normi EU i unapređenje saradnje sa nevladinim sektorom, kao razvojnom komponentom.

Također, značajan razvojni potencijal općine Sanski Most je i njena dijaspora tako da će se poseban dio aktivnosti na institucionaliziranju saradnje sa dijasporom u smislu aktiviranja stranih investicija i drugih oblika privredne, kulturne i socijalne saradnje, povezivanje treće generacije emigranata sa maticom, odnosno na izgradnji evropskog imidža općine Sanski Most.

Prvi od navedenih prioriteta u narednom periodu će biti nastavak kreiranja povoljnog poslovnog ambijenta i unapređenje kapaciteta lokalne uprave, što je ujedno i preduslov za uspješnu realizaciju ostalih aktivnosti. Oba ova prioriteta su komplementarna i međusobno se nadopunjuju u smislu da je neophodno dodatno izmijeniti postojeće propise koji su u nadležnosti lokalne uprave, a tiču se oblasti samostalnog privređivanja i poduzetništva, a da bi to izvršili neophodno je da, prije svega, izmijenimo i unaprijedimo svoj način rada i uskladimo se sa postojećim standardima i praksom koja propisuje regulativa Evropske unije.

Spektar planiranih aktivnosti možda je donekle i široko postavljen, ali uvidom u trenutno stanje na području općine, smatramo da je zaista neophodno izgraditi ljudske, tehničke i administrativne kapacitete svih sudionika u životu lokalne zajednice kako bismo postigli jedan ujednačen i harmoniziran razvoj na području sjelokupne lokalne zajednice.

ONASA: Koji su najčešći problemi s kojima se suočava općina Sanski Most?

AVDAGIĆ: Kao i u ostalim općinama na području Bosne i Hercegovine i regiona, osnovni problem i u Sanskom Mostu je visoka stopa nezaposlenosti i nedostatak investicija. Današnja struktura privrede Sanskog Mosta je uglavnom uslužno orijentirana, s tim da je u posljednje četiri godine prisutan trend povećanja broja zaposlenih u sektoru prerađivačke industrije. U periodu prije ratnih dešavanja u BiH struktura privrede Sanskog Mosta se bazirala na velikim industrijskim kapacitetima, gdje je, primjera radi, samo u preduzeću ŠIP "Sana" bilo zaposleno blizu 2.500 radnika, a koje danas ne radi i očekuje se pokretanje stečajnog postupka.

Ovom konstatacijom dolazimo do druga dva problema - katastrofalno provedena privatizacija na području Sanskog Mosta i neusklađenost lokalnog sistema obrazovanja sa realnim potrebama tržišta rada. Gotovo svi veliki privredni giganti su nakon završetka ratnih dejstava prešli u nadležnost Vlade USK koja je putem Agencije za privatizaciju USK vršila proces njihove privatizacije koji ni do danas nije u potpunosti proveden, a i onaj dio preduzeća koji je našao novog vlasnika trenutno nisu u funkciji.

Time je stvoren dodatni problem lokalnoj upravi koja nastoji da riješi pitanje zbrinjavanja prijašnjih uposlenika iz navedenih preduzeća. Nadalje, novootvoreni privredni subjekti često nailaze na problem pronalaska adekvatne i kvalitetne radne snage gdje nailazimo na dvostruki problem - najveći broj nezaposlenih lica, njih 78 posto su dugoročno nezaposleni, odnosno teško zapošljive kategorije koje uključuju lica koja su do rata u BiH bili zaposleni u velikim privrednim gigantima koji su uništeni ili neuspješno privatizirani i skoro 20 godina su nezaposleni i samim tim tehnički, obrazovno i operativno zastarjeli i prevaziđeni, i kao takvi nekonkurentni na trenutnom tržištu rada, sa malim šansama za novim zaposlenjem.

Drugu stranu problema predstavljaju "svježi" kadrovi koji po završetku strukovnog školovanja nemaju zadovoljavajući nivo praktičnih znanja i vještina kako bi odgovorili modernim zahtjevima tržišta, jer se radi o licima čije se školovanje provodi prema zastarjelom planu i programu koji je decenijama nepromijenjen, uz vrlo malo praktične izobrazbe koja bi pratila aktuelne trendove u usvajanju modernih tehnologija i metoda rada.

KORISNI LINKOVI ZA PREDPRISTUPNE
FONDOVE EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu



Sanski Most



Važan problem predstavlja i finansijska ovisnost lokalne uprave od viših nivoa vlasti i međunarodnih partnera u pogledu realizacije razvojnih projekata. Trenutna struktura prihoda pokriva osnovne tekuće troškove Općine, uz vrlo malo prostora za veće razvojne investicije tako da smo prisiljeni tražiti pomoć spoljnih partnera - ministarstava, nadležnih agencija i zavoda, te međunarodnih izvora finansiranja.

Nažalost, kako je ekonomska kriza zahvatila sve strukture i nivoe državne vlasti, i njihova podrška je već nekoliko godina unazad sve manja što predstavlja poseban problem za lokalni nivo vlasti.

ONASA: Kako biste ocijenili trenutnu ekonomsku situaciju na području općine?

AVDAGIĆ: Trenutna ekonomska situacija na području Sanskog Mosta je uglavnom refleksija trenutne situacije u cijeloj Bosni i Hercegovini. Zaposleno je 5.482 lica naspram 4.400 nezaposlenih i svakodnevno nastojimo da nizom mjera kreiramo što povoljniju ekonomsku politiku, ali treba naglasiti da Općina kao organ uprave u toj oblasti ima vrlo malo ovlaštenja i nadležnosti. Trenutno je u Sanskom Mostu u ekspanziji poljoprivredna djelatnost, najviše plastenička proizvodnja - stočarstvo, voćarstvo i povrtlarstvo, te drvoprerađivačka i metaloprerađivačka industrija. Međutim, da bi neutralnom posmatraču trenutna ekonomska situacija Sanskog Mosta bila jasna, neophodno je uzeti u obzir jedan širi kontekst.

Naime, nakon ratnih dešavanja Sanski Most, pored demografske "kataklizme" pretrpio je ogromne infrastrukturne gubitke. Dovoljno je spomenuti da je samo u stambenoj infrastrukturi bilo neophodno izvršiti kako djelomičnu, tako i potpunu adaptaciju i izgradnju oko 12.000 stambenih jedinica, zatim tu je putna, vodovodna, kanalizaciona i elektro, energetska infrastruktura je bila u potpunosti devastirana, tako da danas više od 95 posto općine ima pristup elektro - energetskom sistemu, 70 posto općine je snabdjeveno pitkom vodom više od javnog i lokalnih vodovoda, sva naseljena mjesta imaju putnu komunikaciju s centrom grada, tako da je pri razvoju lokalne privrede trebalo ispuniti niz velikih infrastrukturnih zahvata kako bi se prije svega obezbijedio minimum uvjeta za nesmetan život lokalnog stanovništva koje je četiri godine bilo raseljeno usljed ratnih sukoba.

Trenutno imamo registrirana 1.364 privredna subjekta, od čega 572 pravnih lica i 792 obrta. Broj privrednih subjekata je u stalnom porastu, tako da se broj pravnih lica povećava na godišnjem nivou u prosjeku za 17 subjekata u posljednjih pet godina, dok je u istom periodu broj obrta povećan za ukupno 31 subjekt, odnosno 6,2 prosječno na godišnjem nivou. U posljednje tri godine broj obrta je skoro na identičnom nivou.

Od 2007. do 2010. godine imali smo trend opadanja broja novoregistriranih preduzeća, s tim da je od 2011. godine situacija nešto povoljnija i imamo blago povećanje broja novoregistriranih subjekata. S druge strane, broj zatvorenih preduzeća je nepromijenjen već posljednje četiri godine i od 2007. godine do danas imamo blizu 50 novootvorenih subjekata više u odnosu na zatvorene. Posebno nas raduje i trend povećanja izvoza u odnosu na uvoz koji je prisutan od 2011. godine, ali s druge strane makroekonomski podaci pokazuju da je i uvoz već nekoliko godina u fazi opadanja. Znatno povećanje ukupnog izvoza je rezultiralo proširenjem inozemnog tržišta pojedinih malih preduzeća iz oblasti metalne i drvne industrije, odnosno jačanjem domaće proizvodnje, jer je povećanje izvoza registrirano u gotovo svim proizvodnim sektorima. Za razliku od povećanja izvoza koji se može povezati sa izvjesnim jačanjem izvozno orijentirane industrije, pad uvoza je najvjerovatnije uzrokovan padom kupovne moći lokalnog stanovništva, odnosno ekonomskom krizom koja se najviše primjećuje na lokalnom nivou.

ONASA: Jeste li zadovoljni stepenom zaposlenosti na području općine Sanski Most i šta općinska vlast radi na povećanju zaposlenosti, posebno mladih i obrazovanih kadrova?

AVDAGIĆ: Kako je već navedeno, u Sanskom Mostu je trenutno zaposleno 5.482 lica i u saradnji s privrednim subjektima i institucijama viših nivoa vlasti svakodnevno nastojimo da realiziramo niz projekata usmjerenih ka povećanju zaposlenosti i otvaranju novih radnih mjesta, te poboljšanju konkurentnosti lokalnih preduzeća. Prema zvaničnim podacima, u proteklih pet godina imamo prisutno smanjenje broja nezaposlenih žena i taj trend smo nastojali nastaviti implementacijom dva projekta iz lokalnog Gender akcionog plana, gdje smo u saradnji sa holandskom razvojnom agencijom SNV i naša dva udruženja - Terra Sana i LAG "Una - Sana", u fazi implementacije projekata usmjerenih ka jačanju ženskog poduzetništva gdje smo uspostavili destileriju eteričnih ulja (prvu na ovom dijelu BiH) i uzgoj ljekovitog bilja, te podržali razvoj šest tradicionalnih zanata u okviru porodičnih obrta što je rezultiralo zaposlenjem oko 30 žena u ruralnim područjima.

U saradnji s dva preduzeća iz oblasti metaloprerađivačke - GAT i "Remus", Zavodom za zapošljavanje i Razvojnom agencijom USK, te Srednjom mješovitom školom imamo uspostavljenu saradnju u smislu praćenja stanja na tržištu rada i stručne dokvalifikacije i usavršavanja mladih kadrova. Već smo realizirali projekt stručnog opremanja Srednje mješovite škole u saradnji sa preduzećem GAT FIRMA projektom USAID-a i Federalnim ministarstvom razvoja, poduzetništva i obrta gdje je izvršena nabavka CNC mašine neophodne za praktičnu nastavu budućih CNC programera kao deficitarnog zanimanja.



Sanski Most

"Važan problem predstavlja i finansijska ovisnost lokalne uprave od viših nivoa vlasti i međunarodnih partnera u pogledu realizacije razvojnih projekata. Trenutna struktura prihoda pokriva osnovne tekuće troškove Općine, uz vrlo malo prostora za veće razvojne investicije tako da smo prisiljeni tražiti pomoć spoljnih partnera - ministarstava, nadležnih agencija i zavoda, te međunarodnih izvora finansiranja".



Grb Općine Sanski Most

**KORISNI LINKOVI ZA PREDPRISTUPNE
FONDOVE EU:**

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

“U vezi sa privlačenjem investicija, Općina Sanski Most je učestvovala u procesu certificiranja općina sa povoljnim poslovnim okruženjem u okviru Projekta BFC (Business friendly certificate) koji je realiziran u saradnji sa Federalnim ministarstvom razvoja, poduzetništva i obrta...”

Sličan projekt obuke i usavršavanja planiramo uskoro realizirati i sa pomenutom kompanijom "Remus" gdje je predviđena dodatna obuka za 50 polaznika od kojih će 35 dobiti stalno zaposlenje. Ovo posljednje je direktno vezano na konstataciju da trenutni kvalitet obrazovanja ne može odgovoriti potrebama tržišta u smislu stručnih znanja i vještina koje stižu mladi kadrovi, te da je izražena velika potreba za permanentnim i neformalnim obrazovanjem.

Dodatne aktivnosti na polju stručne dokvalifikacije Općina je poduzela i osnivanjem resursnog centra u sklopu LAG-a "Una - Sana" gdje je izvršeno tehničko opremanje računarske sale koja je ustupljena na stalno korištenje svim privrednim subjektima u smislu dodatnih edukacija uposlenih i unapređenju ljudskih i administrativnih kapaciteta.

Kako je poljoprivredna djelatnost jedna od strateških opredijeljenja općine Sanski Most, u saradnji s Kraljevinom Švedskom 1997. godine osnovali smo Srednju poljoprivrednu školu "Sanus futurum" koja predstavlja jednu od vodećih obrazovnih institucija na području Unsko-sanskog kantona. Škola je internatskog tipa sa više od 70 ležajeva, potpuno i vrhunski opremljena laboratorijskim i terenskim učilima, a od strane Općine ustupljeno joj je i više od 300 hektara poljoprivrednog zemljišta tako da ima izrazito razvijenu plasteničku, voćarsku, ratarsku i stočnu proizvodnju.

Škola je opremljena neophodnom poljoprivrednom mehanizacijom čime su stvoreni svi preduslovi za stručni razvoj i usavršavanje u oblasti poljoprivredne proizvodnje prema najnovijim standardima EU.

Pored navedenog, imamo uspostavljenu uspješnu saradnju i sa Zavodom za zapošljavanje gdje nastojimo da njihove poticajne programe vezano za otvaranje novih radnih mjesta što detaljnije upoznamo s lokalnim privrednicima i da kroz dodatna sredstva u općinskom budžetu namijenjena podršci lokalnoj privredi potaknemo preduzeća na izradu i implementaciju projekata usmjerenih ka otvorenju novih radnih mjesta.

ONASA: Ko su nosioci privrednog razvoja općine Sanski Most?

AVDAGIĆ: Privreda Sanskog Mosta je uglavnom uslužno orijentirana, s tim da je u posljednje vrijeme sve više izražena i prerađivačka industrija. Prema dostupnim podacima, u proteklih pet godina na području Sanskog Mosta je uloženo više od 22.000.000 KM od strane domaćih i inozemnih investitora, od čega oko 30 posto su investicije u oblasti trgovine (veći trgovački centri koji su otvorili poslovnice u Sanskom Mostu), zatim 25 posto navedenog iznosa su investicije u oblasti drvoprerađivačke industrije, po 15 posto su investicije u metaloprerađivačkoj industriji i građevinarstvu, oko deset posto spada na industriju građevinskog materijala, a ostatak od oko pet posto su investicije u turizmu.

Konkretno govoreći, najuspješnije kompanije s područja Sanskog Mosta su GAT, "Remus" - metaloprerađivačka industrija, "PVC Horozović" - proizvodnja PVC stolarije, "Milk San", "API med" - prehrambena industrija, "Pelet Horozović", "Scontoprom", CAT - drvena industrija, "Banja ILIDŽA" - turizam, "Divel", "Fadalti", ECK - građevinarstvo. Većinu privrednih subjekata čine obrti, te mikro i mala preduzeća širokog spektra poslovanja, a značajan udio u ekonomskom razvoju Sanskog Mosta ima i kooperantska poljoprivredna proizvodnja i poljoprivredna udruženja, najviše u oblasti stočarstva, ratarstva i voćarstva.

ONASA: Koje grane privrede imaju potencijale za ulaganje u Sanski Most i šta Općina planira učiniti kako bi privukla investitore?

AVDAGIĆ: Prije svega to su prehrambena, drvena i metaloprerađivačka industrija, a u posljednje vrijeme sve je više aktueliziran i hidroenergetski sektor. U posljednjih nekoliko godina, poljoprivredna proizvodnja je u ekspanziji, ali problem predstavlja nedostatak prerađivačkih kapaciteta, tako da su lokalni poljoprivredni proizvođači oštećeni u smislu proizvodnje i prodaje sirovine odnosno poluproizvoda po veoma niskim otkupnim cijenama, da bi se zatim gotovi proizvodi od tih istih sirovina uvozili po enormno visokim cijenama.

S druge strane, i globalni trend povećanja cijena i potražnje kvalitetnih prehrambenih proizvoda nameće potrebu realizacije investicija u oblasti pokretanja prehrambenih prerađivačkih kapaciteta. Trenutno imamo urađene dvije studije vezano za unapređenje plasteničke proizvodnje i preradu šumskih plodova i ljekovitog bilja i nastojimo da nađemo adekvatne investitore za realizaciju projekata ove vrste.

Također, ako se uzme u obzir nekadašnja struktura privrede Sanskog Mosta i trenutni razvojni potencijali, zaključuje se da je ovo područje pogodno za razvoj drvene i metaloprerađivačke industrije gdje već postoji niz uspješnih i respektabilnih preduzeća iz ovih oblasti. Sanski Most raspolaže sa oko 38.500 hektara šume koja predstavlja važnu bazu sirovine za razvoj ovog sektora. Trenutno je razvijena proizvodnja rezane građe, industrija namještaja, stolarije, te peleta čime je zaokružen ciklus iskorištavanja drvene mase, ali ne u dovoljnom obimu.



Najizraženija je proizvodnja rezane građe, odnosno obrada drveta je još na izrazito niskom stepenu i radi se uglavnom o proizvodnji sirovina i poluproizvoda. U narednom periodu neophodno je realizirati neke od investicija usmjerene ka maksimalnom iskorištavanju drvene mase gdje se prije svega misli na proizvodnju goriva na bazi biomase, te izvozno orijentiranoj industriji dizajniranog namještaja.

Obzirom na cijenu energenata i radne snage, a i zbog tradicije u toj oblasti, i metaloprerađivačka industrija predstavlja jednu od važnijih privrednih grana Sanskog Mosta. Postoji već nekoliko preduzeća iz ove oblasti, uglavnom izvozno orijentiranih, koja vrlo uspješno posluju i prema rezultatima njihovog rada zaključuje se da metaloprerađivački sektor, uz adekvatnu kvalitetu proizvoda, ima prilično stabilno tržište s tendencijom rasta i svakako treba biti jedan od razvojnih potencijala Sanskog Mosta.

U posljednje vrijeme sve se više aktualizira priča o mogućnosti pokretanja hidroenergetskog sektora. U tom pravcu Općinsko vijeće Sanski Most je donijelo odluku o davanju saglasnosti na izdavanje koncesija za izgradnju mini hidrocentrala kapaciteta do 5 MW na vodama druge i treće kategorije koje su u nadležnosti lokalne samouprave (pritoke rijeke Sane), dok smo kategorički protiv izgradnje hidroakumulacija i centrala na rijeci Sani.

Smatramo da zbog izrazito razvijene hidrografske mreže pritoke rijeke Sane mogu sasvim adekvatno odgovoriti na potrebe izgradnje enegretskih postrojenja manjih kapaciteta, bez narušavanja vodenog i eko sistema u dolini Sane koja je ujedno i žila kucavica cijele općine. Revitalizacijom Rudnika mrkog uglja Kamengrad i prijedlogom nacrtu Prostornog plana Federacije BiH stvorile su se i pretpostavke o izgradnji termoelektrane kapaciteta 2 x 125 MW, čime bi se formirao subjekt sa oko 900 zaposlenih, što je iako velika investicija, ipak jedna realna mogućnost koju će u narednom periodu općinska uprava uzeti u detaljno razmatranje.

U vezi sa privlačenjem investicija, Općina Sanski Most je učestvovala u procesu certificiranja općina sa povoljnim poslovnim okruženjem u okviru Projekta BFC (Business friendly certificate) koji je realiziran u saradnji sa Federalnim ministarstvom razvoja, poduzetništva i obrta, Ministarstvom za regionalnu saradnju i ekonomske odnose RS i Nacionalnom alijansom za lokalni ekonomski razvoj Srbije (NALED), sa općinom Ljubuški i gradovima Banja Luka i Prijedor, uz finansiranje Vlade republike Njemačke i njemačke razvojne službe GTZ.

Ovaj certifikat predstavlja priznanje za kvalitet rada i usluga u oblasti samostalnog privređivanja i kroz ovaj projekt Općina Sanski Most je nastojala da maksimalno unaprijedi rad svojih administrativnih službi i da ih prilagodi savremenim potrebama domaćih i stranih investitora. Izvršili smo izmjenu niza odluka i propisa iz oblasti privrede koji su u našoj nadležnosti, usvojeni su neki pravilnici i metode rada koji olakšavaju poslovanje na lokalnom nivou, formiran je Općinski privredni savjet kao savjetodavno tijelo kroz koje privrednici direktno utiču na proces donošenja odluka i slično. Kroz cijeli ovaj proces nastojimo da općinsku administraciju i procedure sagledamo sa pozicije privrednika kako bismo izgradili što jače partnerstvo javnog i privatnog sektora u cilju lokalnog ekonomskog razvoja.

Pored navedenog, u proteklom periodu smo nastojali da unaprijedimo i poslovnu infrastrukturu, te smo u okviru Industrijske zone Šejkovača u Sanskom Mostu izgradili veći dio putne, kanalizacione, vodovodne i elektro-energetske mreže, riješili imovinsko-pravne donose, izvršili parcelizaciju zemljišta i priveli namjeni, te ga uputili u proceduru prodaje po principu javnih natječaja.

Zona trenutno obuhvata 44 parcele za objekte poslovnog tipa, od čega je 38 već sagrađeno i u funkciji. Na taj način stvorili smo infrastrukturne preduvjete za razvoj biznisa koji bi trebali odgovoriti na zahtjeve potencijalnih investitora.

ONASA: Kakvi su trendovi, odnosno da li imate najave otvaranja novih privrednih subjekata?

AVDAGIĆ: Sanski Most u posljednje tri godine bilježi povećanje izvoza, a prošle godine je čak zabilježen veći izvoz od uvoza. Prema međunarodnoj trgovinskoj klasifikaciji, najveći izvoz se ostvaruje u oblasti gotovih proizvoda i sirovina, te transportnih sistema i uređaja - više od 50 posto izvoza, a najveći uvoz se ostvaruje u oblasti prerađivačke industrije i to uvoz hrane, pića i gotovih proizvoda.

Od najavljenih investicija, trenutno je u pripremnoj fazi izgradnja tvornice alumijskih montažnih kuća za koje je već obezbijeđen plasma na tržištu Švicarske, zatim u izgradnji je i objekt prvog domaćeg trgovačkog lanca s područja Sanskog Mosta, a nedavno je izvršena prodaja zemljišta za izgradnju velikog distribucijskog centra za sjeverozapadnu BiH u vlasništvu jedne domaće kompanije koja se bavi prometom lijekova.

Sve tri navedene investicije uključuju otvorenje minimalno 100 novih radnih mjesta. Pored navedenog, u saradnji s jednim lokalnim udruženjem za ekonomski razvoj pokrenuli smo procedure pokretanja proizvodnje dizajnerskog pletenog namještaja za turističke i ugostiteljske objekte na području Jadrana, što bi na kraju trebalo rezultirati zapošljavanjem još minimalno 20 osoba u ruralnim područjima.



Sanski Most

“Sanski Most u posljednje tri godine bilježi povećanje izvoza, a prošle godine je čak zabilježen veći izvoz od uvoza.”

“Od najavljenih investicija, trenutno je u pripremnoj fazi izgradnja tvornice alumijskih montažnih kuća za koje je već obezbijeđen plasma na tržištu Švicarske...”



Sanski Most

**KORISNI LINKOVI ZA PREDPRISTUPNE
FONDOVE EU:**

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfoecar.ba
www.balkanfund.org
www.eurelmed.com
www.eacea.ec.europa.eu

“Prema podacima Turističke zajednice USK o pitanju broja dolazaka i noćenja turista, u protekle četiri godine prisutan je stalni trend porasta broja turista, a najveći broj ih je iz Hrvatske, Slovenije, Njemačke, Holandije, skandinavskih zemalja. Indikativno je da se radi o zemljama gdje je trenutno naseljen veći broj prijeratnog stanovništva Sanskog Mosta.”

Također, bitno je napomenuti da znatan broj privrednih subjekata koji su nosioci lokalnog razvoja konstantno proširuju svoje proizvodne kapacitete uz zapošljavanje novih radnika, što je u direktnoj korelaciji s povećanjem izvoza i obima industrijske proizvodnje. Sve veći broj i poljoprivrednih proizvođača - kooperanata vrši registraciju svojih gazdinstava i obrta što je jedan od preduslova za realizaciju poticajnih mjera viših nivoa vlasti, pa možemo zaključiti da i u toj oblasti dolazi do velikih pomaka organizacije i discipline poljoprivrednih proizvođača.

ONASA: U kojoj fazi je realizacija projekta "Oživljavanje prekograničnih partnerstava kroz ruralni razvoj" u koji su, osim Vaše općine, uključene i bh. općine Bosanska Krupa i Bužim, kao i hrvatske općine Topusko, Gvozd, Vojnić i Krnjak.

AVDAGIĆ: Projekt "Oživljavanje prekograničnih partnerstava kroz ruralni razvoj" koji je finansiran sredstvima Evropske unije iz IPA sredstava prekogranične saradnje Hrvatska - BiH je uspješno implementiran, a implementacija je završena krajem januara 2013. godine.

Ovo je za nas kao partnere u projektu bio izuzetno značajan projekt kako zbog iskustva koje smo stekli kroz izradu i implementaciju ovako zahtjevnog projekta, tako posebno zbog postignutih rezultata. Svakako je značajno to što je naša Lokalna akciona grupa Una - Sana izgradila kapacitete za izradu i implementaciju najzahtjevnijih projekata.

Ovim projektom je uspostavljena kvalitetna saradnja sa prekograničnim općinama u Hrvatskoj na polju razvoja ruralnog turizma. Ove rezultate možemo podijeliti na nematerijalne i materijalne. Nematerijalni rezultati su prijenos "know how" za članove ciljane skupine u regijama kroz projekt, nove veze među regijama, kanali transfera znanja, dok su materijalni rezultati prvi put je u općini Sanski Most formiran turistički info centar koji djeluje na polju razvoja ruralnog turizma kroz razvoj turističke ponude, afirmacije i promocije turističkih potencijala općine, razvoj industrije suvenira i organiziranja konkretnih turističkih tura. Projektom je, također, oformljen i opremljen turistički info-centar u susjednoj općini Bosanska Krupa i ovi turistički info-centri djeluju zajednički i na taj način doprinose međuopćinskoj saradnji. Osim toga, 140 lokaliteta kulturne i prirodne baštine sa obje strane granice definirani su kao Regionalni turistički proizvod koji je predstavljen u zajedničkoj brošuri Regija bez granica i zajeničkoj web stranici www.crobihtour.com. Blizu 60 osoba je osposobljeno za buduće aktivnosti razvoja održivog turizma u regiji kroz setove edukacija i studijskih posjeta sa obje strane granice, a 16 nezaposlenih educirani su za turističke vodiče u regiji od čega osam na bh. strani, a u općini Sanski Most kroz ovaj projekt certificirana su tri turistička vodiča.


ONASA: Šta općina Sanski Most može ponuditi turistima u nadolazećoj turističkoj sezoni?

AVDAGIĆ: S obzirom na to Sanski Most u ljetnom periodu doživi, u određenom smislu, "demografsku ekspanziju", i turizam predstavlja jednu od bitnih razvojnih komponenti općine. Naime, veliki dio stanovnika Sanskog Mosta je usljed ratnih i ekonomskih prilika trenutno živi van granica BiH, tako da tokom jula i augusta u Sanskom Mostu boravi blizu 15.000 prijeratnih stanovnika i njihovih gostiju.

Prema podacima Turističke zajednice USK o pitanju broja dolazaka i noćenja turista, u protekle četiri godine prisutan je stalni trend porasta broja turista, a najveći broj ih je iz Hrvatske, Slovenije, Njemačke, Holandije, skandinavskih zemalja. Indikativno je da se radi o zemljama gdje je trenutno naseljen veći broj prijeratnog stanovništva Sanskog Mosta. Za domaće i strane goste već godinama zaredom, najviše zbog pristupačnih cijena, je i dalje atraktivan noćni život grada, te prirodne ljepote i kulturno-historijsko naslijeđe koje nastojimo valorizirati i maksimalno uključiti u stalnu turističku ponudu grada. Trenutno su u ponudi kapaciteti Banje "Ilidža", dva aqua parka u širem gradskom jezgri, turistički kompleks Kamengrad koji obuhvata konzerviranu Kamengradsku tvrđavu, sultan Fatihovu Musallu (jedinu u BiH) i vodopad rijeke Blihe, te niz sadržaja u okviru naše tradicionalne kulturno-zabavne manifestacije "Ljeto na Sani" koja se ove godine održava po sedamnaesti put.

Općina Sanski Most, prije svega, aktivno radi na definiranju i stavljanju u funkciju najperspektivnijih lokaliteta u turističku ponudu. U saradnji sa LAG Una-Sana i Turističkim info centrom koji djeluje u okviru ove organizacije ubrzano radimo na promociji postojećih turističkih potencijala i turističke ponude. Urađene su turističke karte grada s osnovnim informacijama potrebnim turistima, stupili smo u partnerstva sa općinama iz BiH i regiona na zajedničkoj promociji i obogaćivanju turističke ponude, član smo mreže ECO BiH turizma i mreže Regija bez granica. Putem LAG Una-Sana i ECO BiH mreže uvršteni smo u konkretne pakete ponude za đачke ekskurzije svih osnovnih škola u BiH. Također se aktivno radi na jačanju industrije suvenira, kao dijela turističke ponude. LAG una-Sana implementira projekt "Žensko poduzetništvo u ruralnom turizmu" koji se provodi u okviru programa "Lokalizacije gendera u FBiH" koji podržavaju UN woman i holandski SNV. Tim projektom ćemo ojačati kapacitete zanatskih obrta koje vode žene, a koji se bave proizvodnjom suvenira, kroz edukacije i nabavku alata i repromaterijala za te obrte. U planu je realizacija još nekoliko projekata za podizanje nivoa turističke ponude a što je najbitnije, intenzivno radimo na povezivanju s privatnim sektorom koji je aktivan u obogaćivanju turističke ponude općine Sanski Most i cijele regije.

U VLADI FBiH ODRŽAN SASTANAK POVODOM INICIJATIVE ZA DONOŠENJE ZAKONA O GRADOVIMA U FBiH



SARAJEVO, 21. juni/lipanj – Inicijativa da se na federalnom nivou donese Zakon o gradovima u Federaciji BiH, bila je povod današnjem susretu premijera Federacije BiH Nermina Nikšića i federalnog ministra pravde Zorana Mikulića s načelnicima općina koje su, ujedno, i kantonalna sjedišta.

Kako je zaključeno, sve te općine će zvaničnu inicijativu za donošenje ovog federalnog propisa dostaviti Federalnom ministarstvu pravde, kako bi se o njoj izjasnila Vlada Federacije BiH, čime bi započela procedura donošenja Zakona o gradovima Federacije BiH.

Tokom sastanka, održanog u Sarajevu, rečeno je da bi, nakon donošenja novog zakona, općinska vijeća kantonalnih sjedišta bila preimenovana u gradska, a njihovi općinski načelnici u gradonačelnike.

Podržavajući inicijativu, načelnici su danas ukazali na brojne prednosti koje bi donijela transformacija osam općina u gradove, kako u privrednim, tako i u ostalim sferama života, saopštio je Ured za odnose s javnošću Federalne vlade.



Sa sastanka načelnika sa
federalnim premijerom

ODRŽAN SASTANAK U VEZI OSNIVANJA KLUBA POVELJE GRADONAČELNIKA U BiH



U kontekstu provođenja proaktivne energetske politike i podizanja ekološke svijesti o energetskej problematiki, zaštiti okoliša i potrebi učinkovitog korištenja energije na Vlašiću je 13. juna/lipnja održan sastanak u cilju osnivanja Kluba „Povelje gradonačelnika/ načelnika u Bosni i Hercegovini“. Ova inicijativa se realizuje uz podršku njemačke organizacije GIZ u okviru regionalnog projekta Otvoreni Regionalni Fond za Energetsku Efikasnost i bilateralnog projekta Energetska Efikasnost u ime njemačke vlade i UNDP-a u BiH.

Sastanku su prisustvovali načelnici, zamjenici načelnika i predstavnici gradova i općina iz BiH, i to: Sarajeva, Novog Sarajeva, Bijeljine, Bosanske Gradiške, Kaknja, Laktaša, Prijedora, Travnik, Trebinja, Zenice, Zvornika, te Centra Sarajeva.

Osnivanje Kluba „Povelje gradonačelnika/ načelnika u Bosni i Hercegovini“ ima za cilj umrežavanje općina i gradova koji su potpisnici Povelje ili to žele postati, onih koji su usvojili Akcioni plan energetske održivosti razvoja gradova (SEAP) ili su u fazi njegove pripreme, ali i onih koji žele da se pridruže Klubu i postanu aktivni na ovom polju. Također, kroz zajedničke aktivnosti i saradnju u Klubu namjera je stvaranje platforme za stručnu razmjenu iskustava na implementaciji mjera iz Akcijskog Plana.

Članstvo u Klubu omogućava općinama i gradovima, lokalnim i regionalnim vlastima u BiH, koji predstavljaju neposrednu upravu građana, i zajedničke nastupe, te iniciranje priprema projekata za apliciranje na EU fondovima.

Evropska inicijativa Povelje gradonačelnika/načelnika (Covenant of Mayors) je jedna od najprogresivnijih evropskih inicijativa. Inicijativi se pridružilo ukupno 4569 gradova i općina potpisivanjem pristupnog dokumenta, dok je iz BiH povelju potpisalo 13 općina/gradova. Ovim dokumentom povezuju se energetske osviješteni gradovi s ciljem razmjene iskustava u primjeni mjera za smanjenje emisije CO₂, uključujući mjere za energetske efikasnosti. Potpisnici Povelje imaju zadatak dostignuti ciljeve koje je definirala Evropska Unija, da smanje za 20% emisiju CO₂ do 2020. godine.

Sastanak je završen dogovorom da je neophodno iskoristiti potencijal i snagu koju imaju bosanskohercegovački gradovi i općine kroz saradnju, zajedničke nastupe i pronalaženje najboljih rješenja. Dogovoreno je da se na sljedećem sastanku, koji će biti održan na jesen ove godine, usaglase i formalni preduvjeti neophodni za funkcionalan rad Kluba.

PREDSTAVNICI 13 OPĆINA TUZLANSKOG KANTONA POTPISALI ENERGETSKU POVELJU

Premijer Tuzlanskog kantona Sead Čaušević i načelnici i predstavnici 13 općina s područja ovog kantona potpisali su 19. juna/lipnja Energetsku povelju kojom su se i zvanično obavezali na uvođenje sistema energetske efikasnosti.

Kontinuirano povećanje energetske efikasnosti, korištenje obnovljivih izvora energije i sistematsko upravljanje energijom vodi ka otvaranju novih radnih mjesta i regionalnom razvoju, navodi se u ovom dokumentu, saopšteno je iz Vlade TK.



Članstvo u Klubu
omogućava općinama i
gradovima, lokalnim i
regionalnim vlastima u
BiH, koji predstavljaju
neposrednu upravu
građana, i zajedničke
nastupe, te iniciranje
priprema projekata za
apliciranje na EU
fondovima.



Radi se o projektu kojim se TK uključio u svjetske tokove za uštedu energije, a pod egidom "gospodarenje energijom je ključ opstanka".

"Budući da su projektom obuhvaćene sve zgrade i objekti u vlasništvu, te od kantonalnog i općinskih interesa, a njih je na području TK više od 400, riječ je o velikoj uštedi čiji se rezultat može



usmjeriti u finansiranje drugih projekata", kazao je kantonalni premijer Čaušević.


Konferenciju o temi "Godina energetske efikasnosti u TK" organizovali su Razvojnog programa UN (UNDP) i Američka agencija za međunarodni razvoj (USAID), čiji su čelni ljudi u BiH danas podcrtali da im je cilj učiniti od TK primjer za cijelu BiH.

Zadovoljni dosadašnjom saradnjom i velikom motivacijom, organizatori i sufinansijeri su najavili niz aktivnosti kojima će, između ostalog, biti pokrivena i tehnička podrška općinama, a sve u cilju sistematskog pristupa upravljanju potrošnjom energije, navodi se u saopštenju.

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

PROMOVIRANI PROJEKTI KOJI ĆE BITI FINANSIRANI IZ SREDSTAVA IPA BIH-CRNA GORA



U Podgorici su 18. juna/lipnja svečano promovirani aplikanti i projekti koji će biti finansirani sredstvima u okviru drugog poziva IPA Prekograničnog programa Bosna i Hercegovina – Crna Gora. Za drugi poziv za dostavu projektnih prijedloga u okviru ovog Programa, spajanjem finansijskih alokacija za 2009. i 2010. godinu bilo je raspoloživo 1,98 miliona eura.

Nakon provedene procedure, odabrano je 8 projekata, od čega u oblasti privrednog razvoja sa naglaskom na turistički i ruralni razvoj tri, unapređenja životne sredine primarno s ciljem zaštite, promocije i raspolaganja prirodnim resursima dva, te u oblasti društvene kohezije i saradnje na polju kulture tri projekta. Konferencija je okupila šezdeset učesnika, među kojima predstavnike

partnerskih organizacija i lokalnih zajednica.


Događaj su organizovali Ministarstvo vanjskih poslova i evropskih integracija Crne Gore i Direkcija za evropske integracije Vijeća ministara BiH, uz pomoć Zajedničkog tehničkog sekretarijata ovog programa. Objava trećeg poziva za dostavljanje projektnih prijedloga u okviru IPA Prekograničnog programa BiH – Crna Gora očekuje se u trećem kvartalu ove godine.

Opšti cilj IPA Prekograničnog programa BiH-Crna Gora je ubrzanje održivog razvoja prekogranične oblasti, njenih ekonomskih, kulturnih, prirodnih i ljudskih resursa. Sve informacije o Programu prekogranične saradnje BiH-Crna Gora na <http://www.cbc.bih-mne.org/>

REGIONALNA KONFERENCIJA O OPĆINSKIM FINANSIJAMA, PROSTORNOM PLANIRANJU I RASPOLAGANJU ZEMLJIŠTEM



U Dubrovniku se od 19. do 21. juna/lipnja održava radionica u okviru programa Dijalog gradova na temu: "Općinske finansije, prostorno planiranje i raspolaganje zemljištem". Dijalog gradova koji se organizira pod okriljem Programa urbanog partnerstva Svjetske banke u Austriji prilika je općinama i gradovima da predstavljaju vlastite zaključke o samoprocjeni lokalnih finansija kao i napredak samoprocjene u oblasti prostornog planiranja i raspolaganja zemljištem. Radionica u Dubrovniku okuplja predstavnike regionalnih i lokalnih vlasti, čelnike lokalnih organa uprave, stručnjake u prostornom planiranju te predstavnike civilnog društva, sve u cilju nastavka javne rasprave na temu povezanosti lokalnih finansija i prostornog planiranja.



Na radionici će se analizirati provedba Akcijskih planova napretka i razmotriti načini međusobne usporedbe i institucionalizacije strogih pravila identifikacije elemenata koji će na transparentan način unaprijediti prakse lokalnih finansija. To će također biti prilika da se zaokruže aktivnosti oko preglednika lokalnog finansiranja te da se lokalnim službenicima ponudi tehnička pomoć u ažuriranju i održavanju baze podataka o lokalnom finansiranju. Konferencija se bavi i temama kao što su: povezivanje pripreme budžeta sa programiranjem investicija, porezi na imovinu u zemljama regiona, prihodi od usluga, upravljanje zemljištem i urbano planiranje sa aspekta legalizacije neformalne gradnje.



Sa konferencije Svjetske banke u Dubrovniku

Ispred Saveza skupu prisustvuju predstavnici Općine Novo Sarajevo.



JAVNI POZIV ZA FINANSIRANJE PROJEKATA LOKALNOG EKONOMSKOG RAZVOJA



Delegacija Evropske unije u Bosni i Hercegovini objavljuje poziv za podnošenje prijedloga projekata za aktivnosti vezane za "Podršku Evropske unije lokalnom ekonomskom razvoju u Bosni i Hercegovini" finansiranih iz instrumenata za predpristupnu pomoć za Bosnu i Hercegovinu iz budžeta za 2011. godinu za neprofitne organizacije i jedinice lokalne samouprave u partnerstvu. Ovaj javni poziv se prije svega fokusira na lokalni nivo kako bi se poboljšala konkurentnost i unaprijedilo poslovno okruženje za mala i srednja preduzeća koja posluju na lokalnom nivou. Krajnji rok

za aplikaciju je 20. septembar/rujan 2013. godine.

Kompletna dokumentacija za prijavu projekata može se dobiti na sljedećoj adresi:

Delegacija Evropske unije za Bosnu i Hercegovinu, Sektor Finansija, Sekcija nabavki, Skenderija 3a, 71000 Sarajevo kao i na sljedećem linku: <http://www.delbih.ec.europa.eu/Tenders.aspx?>

javni poziv se prije svega fokusira na lokalni nivo kako bi se poboljšala konkurentnost i unaprijedilo poslovno okruženje za mala i srednja preduzeća koja posluju na lokalnom nivou.

NAJAVA ODRŽAVANJA PROŠIRENE SJEDNICE PREDSTAVNIČKOG DOMA PARLAMENTA FBiH

Predstavnički dom Parlamenta FBiH zakazao je održavanje proširene sjednice ovoga doma, a u vezi sa upoznavanjem i raspravom o inicijativi za izmjenom Ustava FBiH.

Na sjednicu su pozvani:

- Poslanici u Predstavničkom domu Parlamenta FBiH
- Predsjednik Ustavnog i Vrhovnog suda FBiH
- Predsjednik i potpredsjednici FBiH
- Premijer i članovi vlade FBiH
- Predsjedavajući i potpredsjedavajući Skupština kantona i premijeri Vlada kantona
- **Načelnici / gradonačelnici i predsjedavajući Općinskih / Gradskih vijeća.**
- Ekspertna grupa za reformu Ustava FBiH

Sjednica je zakazana za 24. juni/lipanj u Domu mladih u Centru Skenderija - Sarajevo sa početkom u 12:00 sati.



Savez općina i gradova Federacije Bosne i Hercegovine

Musala 5/1
71 000 Sarajevo

Phone: ++387 33 216 502, 209 024, 209 120

Fax: ++387 33 552 810, 552 811

E-mail: dino@sogfbih.ba

Nađite nas na facebook-u



POSJETITE NAS NA WEB-U

WWW.SOGFBIH.BA

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba


Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

NAJAVA OBILJEŽAVANJA DANA OPĆINA ZA MJESEC JULI/SRPANJ


- **08. juli/srpanj - Dan Općine Tomislavgrad.** Naime, tog datuma 1924. godine položen je kamen temeljac za izgradnju Spomen-bazilike u čast 1000. obljetnice krunidbe prvog hrvatskoga kralja Tomislava. Od 1996. godine ovaj dan se obilježava kao Dan Općine Tomislavgrad.
- **20. juli/srpanj - Dan Općine Stolac** koji je određen povodom blagdana sv. Ilije, zaštinika grada Stoca.
- **20. juli/srpanj - Dan Općine Kiseljak.** Ovaj datum ima i historijski značaj s obzirom da se u Povelji Bele IV iz 1244. godine spominje da je ovaj kralj 20.07.1244. godine darivao Crkvu sv. Mihovila u Borini. Budući da je to najstariji dokument u kojem se spominje mjesto koje je u užem središtu Kiseljaka, taj dan se obilježava kao Dan Općine Kiseljak.
- **26. juli/srpanj - Dan Općine Domaljevac-Šamac.** Obilježava se kao Dan općine zato što je 26. 07. 1996. godine na svečanoj sjednici Općinskog Vijeća Bosanski Šamac donijeta Odluka o utemeljenju nove općine pod nazivom Općina Domaljevac-Šamac.
- **30. juli/srpanj - Dan Općine Glamoč.** Tog datuma 1941. godine prvi put je oslobođena teritorija Glamoča.
- **31. juli/srpanj Dan Općine Trnovo** i dan oslobođenja Trnova 1992.



Domaljevac



Glamoč



Tomislavgrad



Stolac



Kiseljak



Trnovo

Savez / Zajedno za uređenu i razvijenu lokalnu samoupravu